


佛本行集經

第四十六

三百
基六

49751



佛本行集經卷第四十六

基

隋天竺三藏法師闍那崛多譯

大迦葉因緣品中



尔時跋陀羅身正著睡眠其夫起立經行之
時彼地方所有一黑虵欲得行過時跋陀羅
既著睡眠而其一手懸垂床陞畢鉢羅耶瓦
於黑蛇欲從彼過跋陀羅手既垂下懸心作
是念畏彼黑虵螫螫其手即衣裏手擎跋陀
羅臂安床上
尔時跋陀羅以觸臂故睡眠即覺心生恐怖
愁憂不樂意中疑恠即便諮白畢鉢羅耶作
如是言賢善聖子仁於前時可不與我有是



要誓我意不喜行於五欲願脩梵行今爲何
故發如是心畢鉢羅耶報言如是我不行欲
跋陁羅言聖子今若不行於欲何故向者忽
觸我臂

介時畢鉢羅耶依實報言向有黑虵從此而
過我見汝臂懸在床前我於彼時作如是念
恐畏彼虵吐毒螫汝我於彼時以衣裹手擎
持汝臂安置牀上實不故觸如是次第彼之
二人一處居止經十二年同在室內各不相
觸過十二年後有一時畢鉢羅耶父母命終
家業既廣即便經營畢鉢羅耶身自檢校家外
田作其跋陁羅修緝家內所有一切生生之業

尔時畢鉢羅耶曾於一時語跋陀羅作如是
言賢善仁者汝處分教押烏麻油今欲將與
諸牛等飲其跋陀羅即報夫主如聖子教我
不敢違聞是教已喚諸使女而告之言汝等
速疾押烏麻油聖子欲將飲於諸牛

尔時使女聞跋陀羅如是言已即將烏麻置
日中曬而見諸虫百千蠕動見已各各共相
謂言我等當得無量諸罪或復有言我等今
者知有何罪此之罪過屬跋陀羅其使我等
作如是事跋陀羅聞諸使女等作是言已即語
之言若有如是衆罪過者汝等當更莫押於油
尔時跋陀羅遣人拚擋彼烏麻已入於宮內

閉門思惟心中不樂佞頭嘿然寂靜而坐其
畢鉢羅檢校田地觀看迴還見諸衆生受彼
種種無量苦惱復覩諸牛受於困厄作使駟
逐暫不得停見已憂惱佞頭嘿然作是思惟
嗚呼一切諸衆生輩受是苦惱還至其家心
大憂愁顏色不樂佞頭念坐

其跋陁羅見畢鉢羅如是憂惱佞頭思惟見
已到邊到已白言聖子何故如是憂愁心內
不樂佞頭而坐仁今可不作如是念我處分
汝跋陁羅今使人押油不爲我押以此因緣
心不樂也彼即報言賢善仁者我今不以如
此因緣心中不樂佞頭而坐

我於今朝從此而去檢校田作見諸衆生受
種種苦來去行住不得暫安復見諸牛種種
作事不曾停息我見是已作如是念嗚呼嗚
呼諸衆生等乃受是苦我以是故心中不樂
低頭而住

時跋陀羅復報夫言善善仁聖子我今亦見如
是大患其夫問言賢善仁者汝見何患其跋
陀羅次第即說如是因緣尔時畢鉢羅耶語
跋陀羅女作如是言賢善仁者住在家內難
行清淨無缺無犯無損無害終不能盡一形
一命可得稱心修行梵行

其跋陀羅報言聖子是故我等二人詳共捨

家出家是時畢鉢羅耶即便報彼跋陀羅言
賢善仁者汝今且住我當求師若尋得已當
告汝知汝於後時捨家出家

尔時畢鉢羅耶即喚家內所有作使諸男女
等而告之言汝輩可有當我錢財或復穀米
皆屬汝等皆放為良我欲出家修行梵行為
厭離故

尔時畢鉢羅耶取己白縵無價之衣即時用
作彼僧伽梨即請一人剃其鬚髮而作是言
世間可有大阿羅漢而出家者我今隨其出
家修道當於彼時世間未有一阿羅漢唯除
如來多陀阿伽度阿羅訶三藐三佛陀

尔時世尊於晨朝時明相現已證阿耨多羅
三藐三菩提尔時畢鉢羅耶迦葉當於是日
夜分已過日始初出尋亦出家是畢鉢羅耶
迦葉生於大迦葉種姓之內故於世間得迦
葉名彼出家已於聚落內次第乞食漸次而
行復一時間次第遊行到摩伽陀國摩伽陀
聚落至那荼陀村王舍大城其間忽見如來
在彼一神祇處尔時是神名曰多子在於彼
坐甚大端正其身正直猶如虛空之內眾宿
莊嚴迦葉見已即得清淨得無二想我於今
者必見教師我於今者必見婆伽婆我於今
者必見一切智我於今者必見世尊一切見

者我見世尊我見無礙智見者我見世尊彼
大迦葉如是得淨心已心心相續正念不散
頂礼世尊足下巴畢右膝著地在於佛前白
佛言世尊我是世尊聲聞弟子唯願世尊與
我為師我是世尊聲聞弟子也是故論者而
說偈言

彼見佛在多子樹
其心內發一切智

猶如金像光顯赫
合掌歡喜向世尊

於彼林處礼佛足

合掌尊前作是言

唯願世尊為我師

猶如闇處然燈照

尔時世尊告迦葉言迦葉若有聲聞弟子如
是一心正念已訖言是我師如是之心尊重

供養而彼教師不知言知不見言見彼人以
此虛妄語故受是尊重供養之者彼人頭破
作於七分然大迦葉我今知實言知見實言
見我為聲聞諸弟子等說法之時說於因緣
非無因緣非無開遮非但開遮亦現神通非
唯現通亦有開遮非無開遮

復次迦葉我於彼時說於因緣乃至亦有開
遮非無開遮如我所說應奉行之勿得違也
隨順我言若如是者於當來世長夜獲得自
利益事得大安樂也

復次迦葉汝應如是學迦葉汝若欲學如是
行者於梵行人內下中上所應起敬重慚愧

之心迦葉汝應如是學也

復次迦葉汝於彼時常起正念勿暫捨離迦葉汝於此事復應當學

復次迦葉汝於彼時於五陰中應觀生滅之相所謂此是色此是色生此是色滅此是受此是想此是行此是識此是識生此是識滅迦葉汝於是處應如是學

於時長老摩訶迦葉既蒙世尊作是教已生是不淨常乞食食經於七日至於八日如教生智於時世尊如是教已從坐而起於是長老摩訶迦葉侍送世尊

尔時世尊行路未久便在路側到一樹下到

彼樹已然其長老摩訶迦葉取己身上偕伽
梨衣四疊敷地而白佛言世尊是座爲世尊
設憐愍我故佛坐是座作是語已於時世尊
便坐彼座坐已佛告長老摩訶迦葉言迦葉
如此僧伽梨極爲微妙最勝最軟時長老迦
葉白佛言世尊善哉善哉世尊今者憐愍我
故受我是座

於時世尊告彼長老摩訶迦葉作如是言迦
葉汝能持我所著糞掃衣不於時長老摩訶
迦葉白佛言唯然世尊我能持彼如來所著
糞掃衣耳

於時世尊即授長老摩訶迦葉麁糞掃衣世

尊便受摩訶迦葉所著妙服於世間中有人
作疑頗有世尊憐愍他故顯示大德福利之
事至於富勢在先棄捨而受鹿布糞掃之衣
彼所疑者唯應說此摩訶迦葉聲聞弟子是
也乃至能從如來受彼鹿糞掃衣其長老迦
葉乃至得阿羅漢果盡於形壽彼長老摩訶
迦葉不捨此想是故世尊授於彼記汝等比
丘若欲知我聲聞弟子少欲知足行於頭陀
悉具足者所謂長老摩訶迦葉比丘是也
尔時世尊復一時間在舍衛城祇樹給孤獨
園於時世尊告諸比丘言諸比丘我於昔時
離諸欲惡不善之法有覺有觀離生喜樂入

於初禪是時摩訶迦葉比丘亦復如是離諸欲
惡不善之法有覺有觀離生喜樂入初禪行
我於尔時滅於覺觀內清淨心一處無覺無
觀定生喜樂入第二禪是時摩訶迦葉比丘
亦復如是亦滅覺觀乃至入於第二禪行
諸比丘我於尔時離喜行捨憶念正智受於
身樂如賢聖所嘆已捨諸事住於安樂入三
禪行是摩訶迦葉比丘亦復如是離喜行捨
憶念正智受於身樂如賢聖所嘆已捨諸事
住於安樂入三禪行
諸比丘我於尔時欲斷諸苦斷捨諸樂先滅
憂喜不苦不樂捨念清淨入四禪行是迦葉

比丘亦復如是斷苦斷樂先滅憂喜不苦不
樂捨念清淨入四禪行

汝等比丘我於今時正以慈心遍於一方入
定安住如是第一第二第三至第四方如是
上下於一切處一切世間以於慈心遍滿一
切入定安住廣大無量無有怨恨不生毒害
是時摩訶迦葉比丘亦復如是乃至無有怨
恨不生毒害悲喜之心亦復如是

諸比丘我於今時以其捨心遍滿一方入定
安住如是第一第二第三至第四方如是上
下滿一切處一切世間以於捨心悉皆遍滿
入定安住廣大無量無有怨恨不生毒害是

時迦葉比丘亦復如是乃至不害

汝等比丘我於尔時過一切色相滅一切有
對相不思不念一切別異相念無邊虛空處
即入無邊虛空處行是時迦葉比丘亦復如
是過一切色相乃至入無邊虛空處行

諸比丘我於尔時過一切無邊虛空處念無
邊識處即入無邊識處行是時摩訶迦葉比
丘亦復如是乃至入無邊識處行

諸比丘我於尔時過一切識相念一切無所
有相即入一切無所有處行汝諸比丘是時
摩訶迦葉比丘亦復如是乃至入於一切無
所有處行

諸比丘我於尔時過一切無所有相入非有
想非無想處行是時摩訶迦葉比丘亦復如
是乃至即入非有想非無想處行

諸比丘我於尔時過一切非有想非無想處
行是摩訶迦葉比丘亦復如是

諸比丘我於尔時入八解脫行逆順出入入
已還出出已還入是時摩訶迦葉比丘亦復
如是乃至入已還出出已還入

諸比丘我於尔時入八勝處行逆順出入入已
還出出已還入是時摩訶迦葉比丘亦復如
是乃至入已還出出已還入

諸比丘我於尔時入十一切處行入已還出

出已還入是摩訶迦葉比丘亦復如是乃至
入已還出出已還入

諸比丘我於今時遊戲種種神通境界所謂
一身分作多身合於多身共作一身從外入
內從內出外從上入下從下出上石壁山障
徹過無礙入出於地如水不異譬如火炎現
已尋滅日之與月有大威德有大威力而能以
手上捫摸之身得自在乃至梵天汝諸比丘
是時摩訶迦葉比丘亦復如是亦復遊戲種
種神通能以一身分作多身復以多身共作
一身乃至身得自在至於梵天
諸比丘我於今時以淨天耳過於人耳所聞

衆聲或是天聲或是人聲皆悉了聞是時摩訶迦葉比丘亦復如是亦復能用清淨天耳過於人耳乃至一切皆悉了聞

諸比丘我於尔時以他心智知他富伽羅等心行之事即如實知如是心念若願心即如實知願心若無願心即如實知無願心如是

有瞋心如實知有瞋心無瞋心如實知無瞋心有癡心如實知有癡心無癡心如實知無癡心有愛心如實知有愛心無愛心如實知無愛心有爲心如實知有爲心無爲心如實知無爲心小心廣心大心狹心亂心不亂心無量心無邊心有上心無上心入定心不入

定心住定心不住定心解脫心不解脫心如
實即知是時摩訶迦葉比丘亦復如是亦以
他心智知富伽羅等心行之事即如實知如
是心念若有願心若無願心乃至如實知解
脫心不解脫心如實能知

諸比丘我於今時憶知種種宿命之事或一
生處或二或三或四或五或十二三十五
十或百或千或壞一劫或任一劫壞已任任
已壞或知無量壞劫成已壞壞已成我於彼
處如是名字如是姓如是生如是食如是樂
如是苦如是受若干時壽命我於彼處死於
此處生我於此處死彼處生如是相如是形

種種宿命皆悉念知是摩訶迦葉比丘亦復
如是亦以清淨天眼過於天人見於宿命之
事或一生乃至如是相貌如是形種種宿命
皆悉念知

諸比丘我於今時以清淨天眼過於天人見
諸衆生死此生彼或好或醜或生善道或生
惡道隨其業報乃至實知此等衆生具足身
惡行具足口惡行具足意惡行及謗賢聖邪
見顛倒此業和合因緣成故身壞命終墮惡
道中此等衆生具足身善行具足口善行具
足意善行不謗賢聖正見業法因緣故身壞
命終生於善道如是之事以淨天眼過於天

人如實見於彼處死生於此處或勝或劣或
好或醜善道惡道隨業受報皆悉知見是摩
訶迦葉比丘亦復如是如實能知如實能見
諸比丘我於今時諸漏盡已於無漏中心得
解脫慧得解脫於現法中神通自在證安樂
行唱如是言生死已斷梵行成就所作已辦
不受後有是摩訶迦葉比丘亦復如是諸漏
盡已乃至所作已辦不受後有

今時諸比丘白佛言世尊是長老摩訶迦葉
往昔之時作何善業生富貴家資財具足乃
至所作已辦身相端正衆所樂觀世間無比
最上最勝狀如金像作何業因復得出家具

足衆戒證羅漢果又佛授記諸比丘中少欲
知足頭陀第一摩訶迦葉比丘是也作是語
已佛告諸比丘言諸比丘我憶往昔過去之
時有一辟支佛名曰多伽囉尸棄恒住在彼
波羅捺城於彼時間波羅捺處穀貴飢儉白骨
滿地人民多死乞食難得出家之人不能舉措
尔時辟支佛日在東方於晨朝時著衣持鉢入
波羅捺城次第乞食不得如先洗鉢空鉢而出
尔時波羅捺城中有一人其家貧苦而少居
積而彼貧人見辟支佛多伽囉尸棄漸進而
前威儀庠序視地而行進止得所舒顏平視
威儀具足心得正念於時貧人見辟支佛心

得清淨漸到彼已白辟支佛作如是言善哉
大仙於此城中求乞飲食可得以不尊者報
言善哉仁者我於此城乞食不得

時彼貧人白辟支佛言善哉大仙來詣我家
於時彼人家內唯有稗飯一升成熟已訖遂
將辟支來入家中敷設安坐以飯奉獻而諸
辟支佛有如是法以神通力教化衆生不以
餘通

尔時多伽囉辟支佛於彼人所受得食已憐
愍彼故從彼貧舍騰空而去時彼貧人見彼
尊者辟支佛騰空而去彼既見已歡喜踊躍
身心遍滿頂戴十指合掌恭敬頭面作礼乞

如是願願於將來值遇如是辟支聖人或復
勝者若彼聖人所說法要願得聞持速疾解
悟又願生生世世不墮惡道之中

汝等比丘欲知尔時波羅捺城貧苦之人請
多伽囉辟支世尊到其家內而施食者摩訶
迦葉比丘是也時彼貧人以少貯積能以好
心施多伽囉辟支世尊一食緣故千返生於
鬱單越處於無量世往返恒生刹利大姓婆
羅門種居士大家藉是業報因緣力故於迦
葉佛出世之時得為迦尸國王訖利尸子其
迦尸國王訖利尸子恭敬尊重迦葉如來阿
羅呵三藐三佛隨盡於一世然後涅槃是迦

尸國王為佛舍利造七寶塔其七寶者所謂
金銀頗梨琉璃虎珀馬瑙及車渠等其寶塔
內七寶莊校外以石砌覆其寶塔其塔高妙
極一由旬廣半由旬其王子名奢婆陵保隋
言攀於其塔上造七寶蓋遍覆其塔

又有師說造塔八分於比丘僧布施衣服飲
食靴履施已作願願我將來值如是聖彼聖
說法尋即領悟又願不生惡道之中所生之
處得金色身作是事已遂從父王求乞出家
其父不許時彼王子父命終後乃得出家既
出家已讀誦經典成就禪定於彼命終往返
恒生天人之內無量世中遊歷是已於最後

身今得生於左拘陀羯婆羅門家其家巨富
具足財寶乃至所須皆無乏少而是摩訶迦
葉於迦葉佛舍利塔上造七寶蓋供養尊重
因緣力故得金色身以於彼時乞如是願願
我不生惡道以是業報因緣力故從是以來
不墮惡道常得生於天人之處受於無量無
邊樂報而於彼時復乞願言願我將來值是
聖人既得值已勿令背我或勝此聖彼若說
法聞已即解以彼業報因緣力故得值於我
如是教化即值我已即得出家具足衆戒證
羅漢果我所授記諸比丘中少欲知足即此
上座摩訶迦葉比丘是也

諸比丘此是摩訶迦葉往昔所造功德業報
因緣力故生於大富婆羅門家乃至無所乏
少身相端正最妙最勝狀如金像復得出家
具持衆戒證阿羅漢果故我授記少欲知足
頭陀第一者即摩訶迦葉比丘是也

尔時世尊經於多時復一時間告大迦葉作
如是言迦葉汝今將邁少年已過老年復至
汝身所著糞掃奢那麁弊之服宜須捨棄今
可取我上妙衣服迦葉汝來如是之服長者
所施微細輕軟刀所割成縫治著身受他人
請常在佛邊勿離於我作是語已時大迦葉
白佛言世尊我於長夜在阿蘭若亦常讚嘆

阿蘭若法我於長夜乞食活命亦復讚嘆乞
食功德我於長夜著糞掃衣亦復常嘆糞掃
衣德我於長夜不非時食亦復讚嘆不非時
法我於長夜修一坐食亦復讚嘆一坐食法
我於長夜受一揣食節量食噉亦復讚嘆受
一揣食及以讚嘆節量食法我於長夜在於
塚間亦復讚嘆在塚間法我於長夜在於露
地亦復讚嘆在露地法我於長夜住在樹下
亦復讚嘆住樹下法我於長夜在於經行亦
復讚嘆在經行法我於長夜常坐不卧亦復
讚嘆常不卧法我於長夜唯畜三衣亦復讚
嘆畜三衣法我於長夜少欲知足亦復讚嘆

少欲知足我於長夜樂於寂靜亦復讚嘆樂
寂靜法我於長夜不曾樂說無益之語亦復
讚嘆不樂無益言語之法我於長夜常行精
進亦復讚嘆常精進法我於長夜成就正念
亦復讚嘆成正念法我於長夜成就正定亦
復讚嘆成正定法我於長夜成就智慧亦復
讚嘆成智慧法我於長夜常入禪定亦復讚
嘆入禪定法

佛告迦葉作如是言迦葉汝見何利益故長
夜自行阿蘭若法亦復讚嘆行蘭若法乃至
長夜自入禪定亦復讚嘆入禪定法

於是大迦葉白佛言世尊我見二種利故長

夜在阿蘭若處亦復讚嘆行阿蘭若者乃至
長夜常入禪定亦復讚嘆常入定者何等爲
二一者我今現得安樂行法二者爲後世衆
生生憐愍故唯願將來人衆見我等故學我
等行應作是言過去之世有老宿上座聲聞
比丘彼等長夜樂阿蘭若共讚歎阿蘭若行
乃至常入禪定亦復讚嘆常入禪定者我等
云何學於彼行乃至自入禪定讚嘆常入禪
定者世尊我見此二種利故長夜在於阿蘭
若行亦復讚嘆行阿蘭若者乃至常入禪定亦
復讚嘆常入禪定者

佛告大迦葉善哉善哉大迦葉汝於來世爲

多衆生作大利益作大安樂安隱無量諸天
人民是故汝今隨意所樂住阿蘭若處汝於
隨時欲見如來時時來見

於時諸比丘問佛言曰希有世尊是長老摩
訶迦葉何故乃能為多衆生作大利益作是
語已佛告彼等諸比丘言諸比丘是摩訶迦
葉非但現今為衆多人作大利益過去之世
亦為多人作大利益

諸比丘白佛言世尊唯然世尊願說因緣佛
告諸比丘言諸比丘我念往昔此摩訶迦葉
曾作帝釋天王於彼時間無佛出世亦無辟
支佛出世於彼時中一切人輩從人道中命

終已後捨人身已多生惡道少生人天如是
 三十三天夜摩天兜率天化樂天他化自在
 天梵身天墮已多生惡道少生人天於彼之
 時天處人處多有空曠

佛本行集經卷第四十六

基

陛蒲米 蜚音 蜚音 即音 覺音 要音 誓音

邀二 緝同 葺七 飲入 飲於 於於 曬音 所音 賣

蠕一 動音 而音 准音 反音 白音 契音 下音 作音 豔音 赫音 許音 客

捫上 摸音 門音 下音 狹音 侯音 夾音 羅音 力音 加音 捺音 上音 奴音 稗音 拜音 蒲

藉音 反音 夜音 砌音 七音 細音 靴音 反音 兄音 科音 邁音 反音 莫音 敗音 鹿音 弊音

下音 會音 胡音 反音 縫音 治音 上音 逢音 揣音 食音 上音 徒音 官音 反音

